

**Uunga siunnersuut: Tuniniaanissamik nittarsaassisarneq aamma
nalunaaqutsersuisarneq pillugu Inatsisartut inatsisaat nr. xx, xx 2014-imeersoq**
(tuniniaanissamik nittarsaassisarnermut inatsit)

Kapitali 1

*Tuniniaanissamik nittarsaassinermi pitsaasumik ileqqoqarnissaq aamma atuuffissaa
Tuniniaanissamik nittarsaassinermi pitsaasumik ileqqoqarnissaq*

§ 1. Inuussutissarsiornermik ingerlataqartut Inatsisartut inatsisaanni matumani pineqartunut ilaasut atuisut, inuussutissarsiornermik ingerlataqartut aammalu nalinginnaasumik inuiaqatigiinni soqutigisat eqqarsaatigalugit tuniniaanissamik nittarsaassinermi pitsaasumik ileqqoqarnermik takutitsissapput.

Imm. 2. Tuniniaanissamik nittarsaassineq atuisut aningaasaqarnikkut soqutigisaannut tunngassuteqartoq, taakkua aningaasaqarnikkut pissusilersornerannik ersarissumik equtitsinissamut tulluurtuussanngilaq.

Atuuffissaa

§ 2. Inatsisartut inatsisaat manna, nioqutissat kiffartuussissutillu niuerfimmi neqeroorutigineqarsimappata, inuussutissarsiornermik suliaqartunut namminersortunut aamma pisortat suliffeqarfiinut atuuppoq.

Imm. 2. Inatsisartut inatsisaat aningaasarsianut sulinermullu atugassarititaasunut kiisalu ineqarnermut akiliutinut atuutinngilaq.

Imm. 3. § 1, § 3, § 14-15, § 18, § 19 kiisalu § 20 aningaasaqarnikkut suliaqarnermut atatillugu atuutissanngillat.

Kapitali 2

*Niuerfimmi pissusilersorneq pillugu maleruagassat nalinginnaasut
Uukapaatitsisumik assuarnartumillu tuniniaanissamik nittarsaassineq*

§ 3. Inuussutissarsiummik ingerlataqartut, tamanna niuerfimmi atuisut imaluunniit inuussutissarsiummik ingerlataqartut allat aningaasaqarnikkut pissusilersornerannut malunnaateqarluartumik equtitsisinnaappat, paasissutissanik uukapaatitsisumik imaluunniit eqqunngitsumik allassimasunik atueqqusaanngillat imaluunniit paasissutissanik pingaaruteqartunik ilaatitsinngitsooqqusaanatik.

Imm. 2. Tuniniaanissamik nittarsaassineq imarisamigut, ilusimigut imaluunniit periaatsimi atorpeqartumi ukapaatitsisoq, saassusserpalaartoq imaluunniit atuisunut imaluunniit inuussutissarsiummik ingerlataqartunut ileqqorissaanngitsumik sunniteqartumik misigititsisoq, aammalu taakkua aningaasaqarnikkut pissusilersornerannut malunnaateqarluartumik equtitsisinnaasoq, akuerisaanngilaq.

Imm. 3. Pissusiviusut pillugit allassimasut eqqortuussusaat uppersararneqarsinnaassaaq.

Ussassaarutit suussusaat

§ 4. Ussassaarut ilusaa apeqqutaatinnagu aammalu tusagassiuutini sorlorni saqqummersinneqarnerisoq apeqqutaatinnagu, ussassaarutitut ersarissumik paasineqartussanngorlugu saqqummersinneqassaaq.

Sanilliussilluni ussassaarutit

§ 5. Sanilliussilluni ussassaarut tassaavoq ussassaarut sunaluunniit toqqaannartumik imaluunniit toqqaannanngitsumik unammillertaasumut imaluunniit nioqqutissanut kiffartuussissutinullu unammillertaasumit neqeroorutigineqartunut innersuussisoq.

Imm. 2. Inatsisartut inatsisaat manna malillugu ussassaarutit sanilliussineq akuerisaavoq, sanilliussineq:

- 1) ukapaatitsinngippat,
- 2) nioqqutissanut imaluunniit kiffartuussissutinut pisariaqartitsinernik assigiinnut imaluunniit assigiimmik siunertaqartunut tunngassuteqarpat,
- 3) kinaassusersiunngitsuuppat aammalu atuuffissaa ataaseq arlallilluunniit aalajangersimasut attuumassuteqartullu uppersararneqarsinnaasut, aammalu nioqqutissanut kiffartuussissutinullu taakkununga assersuunneqarsinnaaneranut sanilliussippat, ilanngullugu akia
- 4) allagarsiisup aamma unammillertaasup akornanni imaluunniit allagarsiisup aamma unammillertaasup nioqqutissanut nalunaaqutsiussaasa, suliffeqarfiisa aqqisa, allatigut ilisarnaataasa immikkuullarissut, nioqqutissaataasa kiffartuussissutaasalu akornanni paarlaassititsilissanngippat,
- 5) unammillertaasup nioqqutissanut nalunaaqutsiussaannik, suliffeqarfiata aqqanik, allatigut ilisarnaataannik immikkuullarissunik, nioqqutissaataannik, kiffartuussissutaannik, ingerlataannik allatigulluunniit pissutsitsigut tatiginassusiiassanngippat imaluunniit nakkarsaassanngippat.
- 6) unammillertaasup nioqqutissanut nalunaaqutsiussaannut, suliffeqarfiata aqqanut imaluunniit allatigut ilisarnaataannut immikkuullarissunut atatillugu isigineqarneranik ileqqorissaanngitsumik iluaquteqarniassanngippat aamma
- 7) nioqqutissamut nalunaaqutsiussamit imaluunniit suliffeqarfiup aqqanik illersorneqartumik issuaalluni nioqqutissamik sanaartussanngippat imaluunniit kiffartuussissummik

pilersitsissanngippat imaluunniit nioqqutissamik imaluunniit kiffartuussissummik assiliissanngippat.

Pisisussanut aalajangersimasunut piumaffigineqarnani saaffiginnitarneq

§ 6. Inuussutissarsiummik ingerlataqartoq pineqartoq tamatuminnga sioqqutsisumik piumasaqarsimannngippat, nioqqutissanik, pigisanik aalaakkaasunik allanillu pisuussutitik pigisanik kiisalu sullississutitik kiffartuussissutinillu tuniniaanissaq siunertaralugu elektroniskimik allannik, nammineeurluni sianertartunik imaluunniit telefax-imik atuilluni kikkunnulluunniit saaffigineqqusaanngilaq.

Imm. 2. Imm. 1 apeqqutaatinnagu inuussutissarsiummik ingerlataqartoq nioqqutissamik imaluunniit kiffartuussissummik tunisinermut atatillugu pisisartumit taassuma elektroniskimik najugaanik tigusaqarsimasoq, nammineq nioqqutissaatiminik imaluunniit kiffartuussissutiminik assingusunik pisisartumut elektroniskimik allakkatigut tuniniaanissamik nittarsaassisinnaavoq. Tamatumunnga piumasaqaataavoq pisisartoq inuussutissarsiummik ingerlataqartumut najukkaminik tunniussinerminut atatillugu tamatumalu kingorna saaffiginninnermini pisariitsumik akeqanngitsumillu tamatuminnga saaffigineqannginnissaminik piumasaqarnissamut periarfissaqassasoq.

Imm. 3. Inuussutissarsiummik ingerlataqartoq, pineqartoq inuussutissarsiummik ingerlataqartumut taamaalioqqusinani piumasaqarsimappat, imm. 1-imi taaneqartutut tuniniaanissamik siunertaqartumik ungasianiit attaveqatigiinnermut atortunik allanik atuilluni inummut aalajangersimasumut saaffigineqqusaanngilaq.

Imm. 4. Inuk pineqartoq sioqqutsisumik inuussutissarsiummik ingerlataqartumit saaffigineqarnissamik piumasaqarsimappat imm. 3 atuutissanngilaq.

Imm. 5. Imm. 3-imi taaneqartutut inuussutissarsiummik ingerlataqartoq siullermeertumik inummut aalajangersimasumut tamatuminnga peqqusisimannngitsumut saaffiginnikkuni, inuussutissarsiummik ingerlataqartup erseqqissumik paasinartumillu imm. 3-imi taaneqartutut inuussutissarsiummik ingerlataqartumit saaffigeqqunnginnissamik pisinnaatitaaffeqarneq pillugu paasissutissiisaaq. Pineqartoq peqatigisaanik taamaattunik saaffigeqqunnginnermi pisariitsumik periarfissaqartinneqassaaq.

Imm. 6. Imm. 1 malillugu piumaffiginninnermik utertitsinissaq imaluunniit imm. 3-imi taaneqartutut saaffigeqqunnginneq pillugu nalunaarutitik tigusinermut imaluunniit allattuinermut akiliisitsisoqarsinnaanngilaq.

Ilitsersuisarneq

§ 7. Neqerooruteqarnermi, isumaqatigiissuteqarnermi imaluunniit tunniussinerup nalaani pisut malillugit, pisuussutit nalillit imaluunniit sullississutip suussusaa malillugu tamanna pisuussutip imaluunniit sullississutip suussusaanik imaluunniit piginnaasaanik naliliinissamut

pingaaruteqarpat, isumannaatsumik ilitersuisoqassaaq, tassani ilaalluni pingaartumik atorneqarnerani piginnaasaqarnera, atasinnaassusaa, navianassusaa aamma aserfallatsaaliuinissamat periarfissat.

Imm. 2. Iltersuineq oqaatsit ilitersuunneqartussamat paasinartut atorlugit ilitersuussisoqassaaq.

Kapitali 3

Atuisunik illersuineq

Oqaatsinik atuineq

§ 8. Ussassaarineq, allagartalersuineq aamma inini tamanit orninneqarsinnaasuni tuniniaanissamik nittarsaassineq aamma kalaallisut pissaaq, taamaattoq takuuk imm. 2-5. Tuniniaanissamik nittarsaassinermi tapertatut oqaatsit allat atorlugit pisinnaavoq.

Imm. 2. Imm. 1-imi oqaatsinut piumasaqaat allagartalersuinermit poortuusersuinernullu tunngatillugu atuutinngilaq.

Imm. 3. Imm. 1-imi oqaatsinut piumasaqaat oqaasinnaanut, suliffeqarfiup atiitut assigisaannullu atuutinngilaq.

Imm. 4. Imm. 1-imi oqaatsinut piumasaqaat, tuniniaanissamik nittarsaassinerup oqaatsinut piumasaqaatip naleqqutinngitsumik pisariusorujussuarmik pisoqanngippat naammassineqarsinnaanani pinerani imaluunniit oqaatsit allat atorneqarnerat pissusissamisoorpat, atuutissanngilaq.

Imm. 5. Naalakkersuisut imm. 1-imi oqaatsinut piumasaqaat pillugu maleruagassanik aalajangersaasinnaapput, tassani ilaalluni piumasaqaammi ilaatitsinnginnerit.

Tuniniaanissamat nittarsaassinerit meeqqanut inuusuttunullu saaffinnittut

§ 9. Inuussutissarsiummik ingerlataqartup tuniniaanissamik nittarsaassinera meeqqanut inuusuttunullu sammitinneqartoq, meeqqat inuusuttullu pissusissamisoortumik uppertikkuminarneri, misilittagaqannginneri isornartorsiuisinnaannginnerilu, sunneruminarnerannik piimalersikkuminarnerannillu malitseqartartoq, eqqarsaatigalugu ilusilersorneqassaaq.

Imm. 2. Tuniniaanissamik nittarsaassineq meeqqanut inuusuttunullu sammitinneqartoq toqqaannartumik imaluunniit toqqaannanngitsumik nakuusernissamik allatulluunniit navianartumik soqqusaatsumillu pissusilersornissamik kaammattuissanngilaq imaluunniit pissusissaanngitsumik nakuusernissamik, ersiortitsineramik imaluunniit upperisapalaaqarnermik sunniiniutitut atuiffiussanani.

Imm. 3. Tuniniaanissamik nittarsaassineq meeqqanut inuusuttunullu sammitinneqartoq aanngajaarniutinik, ilanngullugu imigassat aalakoornartortallit, eqqartuineramik, assilisanik imaluunniit innersuussutinik imaqartinneqassanngilaq.

Tuniniaanermik siuarsaasunik iliuuseqarnerit

§ 10. Tuniniaanermik siuarsaasunik iliuuseqarnerit nittarsaaneqassapput neqeroorummut tunngavissarititaasut ersarissunngorlugit aammalu atuisartunut pisisartunullu pissarsiariuminartunngorlugit aamma tapiliussatut sullississutit ilaatinneqarpata taakkua nalinga erseqqissumik paasissutissiissutigissallugit.

Imm. 2. Inuussutissarsiummik ingerlataqartoq nioqqutissamik imaluunniit kiffartuussissummik aalajangersimasumik akeqartumik neqerooruteqaruni, aammalu inuussutissarsiummik ingerlataqartup taassuma amerlassusaani neqeroorummut taassumalu tuniniaanissamut nittarsaaneqarnerata annertussusaanut naleqqiullugu naleqquttumi piumanninnermik naammassinnissinnaassanani ilimagisaqarnissaminut naleqquttumik tunngavissaqaruni, inuussutissarsiummik ingerlataqartoq tamanna pillugu tuniniaanissamut nittarsaassinermini erseqqissumik tunuarsimaarfeqassaaq.

Allagartat aamma meqqit akikillisaataasut

§ 11. Meqqit, allagartat assigisaalluunniit nioqqutissamik pisinissaq imaluunniit kiffartuussissummik suliaqarnissaq sioqqullugu atugassiissutigineqartut atorlugit akikillisaasiisoqaqqusaanngilaq allatulluunniit tunniussisoqaqqusaanani.

Imm. 2. Taamaattorli meqqit ataasiakkaat tamarmik tunniussisup atia imaluunniit suliffeqarfiutaa allallugu erseqqissumik nalunaaqutserneqarsimappata, nalinga danskit koruuninik allallugu, inuussutissarsiummik ingerlataqartoq nioqqutissamik tunisinermini imaluunniit kiffartuussissummi suliaqarnermini meqqit imaluunniit allagartat assigisaannilluunniit iluseqartunik kingusinnerusukkut akiliutigineqartussanik akikillisaasiisinnaavoq allatulluunniit tunniussisinnaalluni. Akikillisaatinik meqqinik tunniussisup meqqit ataatsimut katillugu 20 koruuninik annertunermilluunniit aningaasartaqartut akiliutiginnisaat piumasarineqarpat, nalinganut akiliutigittissavaa.

Makitsinerit aamma unammisitsinerit akissarsiassartaqartut

§ 12. Pisuussutininik pigisanik atuisartunut pisisartunullu tuniniaanerit makitsineritut, unammisitsineritut akissarsiassartaqartunut allatulluunniit iliuuseqarneritut peqataanermi iluanaaruteqarnissamik periarfissaqarnermik, inernerisassaannut peqataanissamut tamakkiisumik ilaannaasumilluunniit pisinissamik piumasaqaateqarfiusunik, siuarsarniarneqassanngillat.

Qularnaveeqqusiissutit

§ 13. Qularnaveeqqutinik assigisaannilluunniit tunniussinissaq pillugu nalunaarut, aatsaat nalunaarummi tiguisusaaq inatsisit malillugit pisinnaatitaaffiinit pitsaanerusementik pisinnaatitaaffilerneqassappat atorveqassaaq.

Imm. 2. Qularnaveeqqummik tunniussisoqarpat, inuussutissarsiummik ingerlataqartoq erseqqissumik paatsuugassaannngitsumillu taassuma imarisaa pillugu paasissutissiissaaq aammalu paasissutissat qularnaveeqqummik atuinissamut pisariaqartut tunniutissallugit.

Imm. 3. Qularnaveeqqummik tunniussisoqarpat inuussutissarsiummik ingerlataqartoq erseqqissumik paatsuugassaannngitsumillu ilisimatitsissutigissavaa, atuisartup pisisartullu inatsisit malillugit pisinnaatitaaffii saneqqunneqarsinnaannngitsut qularnaveeqqummit kalluarneqannngitsut.

Imm. 4. Inuussutissarsiummik ingerlataqartoq atuisartumit pisisartumillu qinnuigineqaruni qularnaveeqqut allaganngorlugu tunniutissavaa. Allaganngorlugu qularnaveeqqutit kalaallisut, danskisut imaluunniit tuluttut oqaasertalerneqarsinnaapput. Atuisartup pisisartullu oqaatsit pingasut taakkua arlaat atorlugit qularnaveeqqutip tunniunneqarnissaa kissaatiginerlugu toqqassavaa.

Pisinissamik kaammattuinerit

§ 14. Atuisartumut pisisartumullu saaffiginnittumik pisinissamik kaammattuinerimi, inuussutissarsiummik ingerlataqartup paasissutissat makkua tunniutissavai:

- 1) nioqqutissap imaluunniit kiffartuussissutip ilisarnaatai pingaaruteqartut,
- 2) inuussutissarsiummik ingerlataqartup najugaa atialu,
- 3) pissutsit akiliinissamut, tunniussinissamut aamma isumaqatigiissummik piviusunngortitsinissamut tunngasut, pissutsit taakkua suliassaqaarfimmi ileqquusartumit allaanerusedimappata,
- 4) peqqissimisinnaatitaaneq, taamaatitsisinnaatitaaneq imaluunniit utertitsisinnaatitaaneq, atuisartoq pisisartorlu taamaattumik pisinnaatitaaffeqaarsimappat, kiisalu
- 5) akia, ilanngullugit akitsuutit.

Imm. 2. Nioqqutissaaq imaluunniit kiffartuussissut sioqqutsisumik naleqquttumik akiata naatsorsorneqarnissaa ajornarluni, akiusoq qanoq naatsorsorneqassanersoq allanneqassaaq. Naleqqutsillugu aningaasartuutit allat tamarmik assartuinermut, tunniussinermut imaluunniit nassiussinermut akiusumut tunngasut allanneqassapput, imaluunniit aningaasartuutit taakkua naleqquttumik sioqqutsisumik naatsorsorneqarsinnaannngippata, aningaasartuutit taakkua ilaatinneqarsinnaasut paasissutissiissutigineqassalluni.

Imm. 3. Pisinissamik kaammattuinerit paasineqassaaq attaveqaqatigiinneq niuernermit tunngaveqartoq, tassani tunisassiap suussusaa akialu niuernermit tunngaveqartumik attaveqaqatigiinnermut atorveqartumut naleqquttumik allanneqassallutik, taamaaliornikkullu atuisartunut pisisartumullu pisisinnaalersitsisoqassalluni.

Aaqqissuussaasumik akikillisaasiisarneq

§ 15. Inuussutissarsiummik ingerlataqartup erseqqissumik aammalu pisiniarfimmi ersiinnartumik paasissutissiissutigippagu, peqatigiiffiit, inuit aalajangersimasut imaluunniit kattuffiit sorliit akikillisaavigineqarnersut, aaqqissuussaasumik akikillisaasiisarneq akuerisaavoq.

Imm. 2. Inuussutissarsiummik ingerlataqartoq piumaffigineqarnermini nioqputissanut kiffartuussissutinullu aaqqissuussaasumik akikillisaasiinermi pineqartunut ilaasunut kiisalu taakkua annertussusaannut allattuiffimmik takutitsisinnaassaaq.

Imm. 3. Ungasianiit tuniniaanermi imm. 1-imi taaneqartut paasissutissat akiusunik paasissutissiinermut atatillugu tunniunneqassapput. Paasissutissat imm. 2-imi taaneqartut pisisartup tamanna piumasarippagu tunniunneqassapput.

Imm. 4. Imm. 1-3-imi aalajangersakkat, aaqqissuussaasumik akikillisaasiinerit akikillisaasiisumi atorfeqarnermut atatillugu neqeroorutigineqartutut imaluunniit tunniunneqartut pineqarpata atuutissanngillat.

Allagartalersuineq poortuusersuinerlu

§ 16. Nioqputissaq taassumaluunniit poortorneqarnera erseqqinnerusumik ilitsersuussinikkut nioqputissat amerlassusaat, imarisai katitigaaneralu, atasinnaassusaa aammalu allatigut qanoq suliarineqarsimanera pillugu paasissutissartaqarpat aatsaat, nioqputissat aalajangersimasut Kalaallit Nunaanni niuerfimmi tunineqarsinnaasut imaluunniit tuniniarneqarlutik neqeroorutigineqarsinnaasut pillugu aalajangersakkanik Naalakkersuisut aalajangersaasinnaapput.

Imm. 2. Nioqputissat Naalakkersuisunit akuerineqartunik immikkut poortuusersuuteqartut kisimik Kalaallit Nunaanni niuerfimmi tunineqarsinnaasut imaluunniit tuniniarneqarlutik neqeroorutigineqarsinnaasut pillugu aalajangersakkanik Naalakkersuisut aalajangersaasinnaapput.

Akiusut paasissutissiissutigineqartarneri

§ 17. Inuussutissarsiutigalugu atuisartunut pisisartunullu nioqputissanik neqerooruteqartoq nalunaaqutsersuinnikkut, allagartalersuinnikkut allatigulluunniit erseqqissumik nioqputissamut imaluunniit nioqputissat ilaannut ataatsimut katillugu akiusoq, ilanngullugit akiliutit, aningaasartuutit akitsuutillu, pillugu paasissutissanik tunniussissaaq.

Imm. 2. Inuussutissarsiutigalugu kiffartuussissummik suliaqartoq allagartalersuinnikkut allatulluunniit erseqqissumik sullissinissamut neqeroorutigineqartumut akiusoq pillugu paasissutissiissasoq Naalakkersuisut aalajangersakkanik aalajangersaasinnaapput.

Imm. 3. Kiffartuussissut akiligassanngorlugu suliarineqarpat, atuisartup pisisartullu piunasaqarneratigut taanna akiligassamik immikkoortiteriffiusumik, nioqutissamut, kiffartuussissummut kiisalu nalunaaquttap akunnerinik atuinermut sullissinermut ilaasumut akiusumik misissuisinnaanngorlugu, tunineqassaaq.

Imm. 4. Oqariaatsit tunisinissamik siuarsaat assersuutigalugu ”Neqeroorutip akia”, ”Ussassarinermi akiusoq” imaluunniit ”Akikilliliineq” piviusumik imaqarpata aatsaat atorineqassaaq. Tunisinissamik siuarsaatut oqaaseq akikilliliinermik paasisitsissappat siusinnerusukkut akiusoq atuussimasoq imaluunniit akiusumik appartitsinerup annertussusaa allagarsiinermi imaluunniit allagartalersuinermi allanneqassaaq.

Akiliutit

§ 18. Akiliut paasineqassaaq tassaasoq immikkut kiffartuussinermut, atuuffimmut imaluunniit sullissinermut, nioqutissamik imaluunniit kiffartuussissummik pisinermut atasoq.

Imm. 2. Akiliutit pisineq sioqqullugu erseqqissumik ilisimatitsissutigineqassapput.

Akiitsorluni pisisarneq

§ 19. Nioqutissat atuisartunut pisisartunullu pisinermut akiusoq akilersuinikkut akilerneqarsinnaasoq paasissutissartaqartumik inuussutissarsiuutigalugu neqeroorutigineqarpata, § 17-imi allassimasutut taassumatuut pisiarinerani akiusoq, ataatsimut katillugu akiusoq, ilanngullugit erniat aningaasartaat, akitsuutit aammalu tapiliussat allat, siulequtsiussatut akiliutissaq kiisalu akilersuinerit ataasiakkaat annertussusissaat, amerlassusissaat piffissarlu akilerneqarfissaat pillugit paasissutissanik tunniussisoqassaaq.

Imm. 2. Nioqutissat pisisartunut elektroniskimik neqeroorutigineqarpata inniminniinissaq periarfissaqarluni, imm. 1-imi ilisimatitsinissamut pisussaaffiusoq taamaaqataanik atuutissaaq.

§ 20. § 17 akitsorterussilluni tuniniaanermi aamma qanganitsatut ilusilinnik eqqumiitsulianillu tuniniaanermut atuutinngilaq.

Imm. 2. Atornikunik tuniniaaneq § 17-imi pineqartunut ilaanngitsoq Naalakkersuisut aalajangersakkanik aalajangersaasinnaapput.

§ 21. Allagarsiinikkut allatulluunniit taamaaqataanik iluseqartumik atuisartunut pisisartunullu nioqutissap akia pillugu paasissutissanik tunniussisoqaraangat, paasissutissani §§ 17-imi aamma 19-imi, kiisalu aalajangersakkani § 16, imm. 1 aamma § 17, imm. 2 naapertorlugit aalajangersagaasuni piunasaqaatit naammassineqarsimassapput.

Kapitali 4

Inuussutissarsiummik ingerlataqartunut tunngatillugu maleruagassat Niuertarfiup ilisarnaataa

§ 22. Inuussutissarsiummik ingerlataqartut niuertarfimmut ilisarnaatinik assigisaannilluunniit piginnngisaminnik atueqqusaanngillat, imaluunniit nammineq ilisarnaatiminnik allanut paarlaanneqarsinnaasunik atueqqusaanatik.

Inuussutissarsiornermi isertugaatit aamma titartakkat tekniskiusut

§ 23. Atorfeqartoq imaluunniit suliffeqarfimmut suleqateqartoq imaluunniit tassunga sullissilluni suliaqartoq, pissusissaanngitsumik suliffeqarfiup inuussutissarsiornermi isertugaataannik ilisimasaqalerniarluni pissarsissanngilaq imaluunniit pissarsiniarsarissanani imaluunniit atuissanani.

Imm. 2. Pineqartoq suliffeqarfiup inuussutissarsiornermi isertugaataannik unioqquitsinnngitsumik ilisimasaqalersimaguni imaluunniit atugassaqaruni, piginnaatinneqarsimanngikkuni isertugaatinik taamaattunik ingerlatitseqqeqqusaanngilaq imaluunniit atueqqusaanani. Inerteqquteqarneq atorfeqarnerup, suleqateqarnerup suliaqarnerulluunniit unereernerata kingorna ukiuni pingasuni atuutiinnassaaq.

Imm. 3. Imm. 1-imi aamma 2-imi maleruagassat taamatuttaaq inunnut allanut suliffeqarfimmut inatsisit malillugit isersinnaasunut atuutissapput.

Imm. 4. Suliassamik suliaqarnermut atatillugu imaluunniit inuussutissarsiorneq siunertaralugu titartakkanik tekniskiusunik, nassuiaatinik, malitassanik, ilusilianik assigisaannilluunniit paasitinneqarsimasoq, najoqqutassanik taamaattunik piginnaatinneqarani atueqqusaanngilaq imaluunniit allanik taamaaliorsinnaalersitseqqusaanani.

Imm. 5. Inuussutissarsiummik ingerlataqartoq inuussutissarsiornermi isertugaatinik ilisimasaqarneq imaluunniit atugassinneqarneq aalajangersakkanik matuma siuliani taaneqartunik unioqquitsinikkut anguneqarsimappat, taakkuninnga atueqqusaanngilaq.

Kapitali 5

Nakkutilliinermut aalajangersakkat

§ 24. Imm. 2-imi aamma 3-imi ilaatinneqartussaannngitsutut taaneqartut atuutsillugit Atuisartoqarnermut Unammilleqatigiinnermullu aqutsisoqarfik Inatsisartut inatsisaanni matumani aalajangersakkat naapertorlugit aalajangersakkanik aalajangersagaasunik unioqquitsisoqannginnissaanik nakkutilliissaaq.

Imm. 2. Naalackersuisut imaluunniit tamatumunnga piginnaatinneqartoq, aalajangersakkanik § 16, imm. 2 naapertorlugu aalajangersagaasunik unioqquitsisoqannginnissaanik nakkutilliissaaq.

Imm. 3. Aalajangersakkanik § 16, imm. 1 naapertorlugu aalajangersarneqartunik unioqqutitsisoqannginnissaanik nakkutilliineq, Naalackersuisunit imaluunniit uumasut nakorsaqarnermut oqartussaasumit Naalackersuisunit toqqarneqarsimasumit isumagineqassaaq.

Imm. 4. Paasissutissat Inatsisartut inatsisaanni aalajangersakkanik unioqqutitsisoqarnersoq aalajangiinissamut pisariaqartinneqartut Atuisartoqarnermut Unammilleqatigiinnermullu aqutsisoqarfiup piumasarisinnaavai.

Imm. 5. Paasissutissat aalajangersakkanik § 16, imm. 1 naapertorlugu aalajangersarneqartunik unioqqutitsisoqarnersoq aalajangiinissamut pisariaqartinneqartut Naalackersuisut imaluunniit uumasut nakorsaqarnermut oqartussaasup Naalackersuisunit toqqarneqarsimasup piumasarisinnaavai.

§ 25. Atuisartoqarnermut Unammilleqatigiinnermullu aqutsisoqarfik isumaqarpat Inatsisartut inatsisaanni aalajangersakkanut, Atuisartoqarnermut Unammilleqatigiinnermullu aqutsisoqarfimmit nakkutigineqartunut akerliusumik iliuuseqartoqarsimasoq, Atuisartoqarnermut Unammilleqatigiinnermullu aqutsisoqarfiup suliassaq eqqartuussivimmut aalajangiiffigisassanngorlugu suliakkiissutigisinnaavaa. Atuisartoqarnermut Unammilleqatigiinnermullu aqutsisoqarfik isumaqarpat, aalajangersakkat pineqaatissiiviusinnaasut Atuisartoqarnermut Unammilleqatigiinnermullu aqutsisoqarfimmit nakkutigineqartut unioqqutinneqarsimasut, Atuisartoqarnermut Unammilleqatigiinnermullu aqutsisoqarfiup politimesteri unnerluussuteqaqqullugu qinnuigisinnaavaa. Tamanna aamma atuuppoq eqqartuussivimmit inerteqquteqarneq unioqqutinneqarsimappat.

Imm. 2. Naalackersuisut imaluunniit uumasut nakorsaqarnermut oqartussaasoq Naalackersuisunit toqqarneqarsimasoq isumaqarpat aalajangersakkanut § 16, imm. 1 naapertorlugu aalajangersarneqarsimasunut akerliusumik iliuuseqartoqarsimasoq, Naalackersuisut imaluunniit uumasut nakorsaqarnermut oqartussaasup Naalackersuisunit toqqarneqarsimasup suliassaq eqqartuussivimmut aalajangiiffigisassanngorlugu suliakkiissutigisinnaavaa. Naalackersuisut imaluunniit uumasut nakorsaqarnermut oqartussaasoq Naalackersuisunit toqqarneqarsimasoq isumaqaruni § 16, imm. 1, imaluunniit aalajangersakkat § 16, imm. 1 naapertorlugu aalajangersarneqartut uumasunut nakorsaqarnermut immikkoortortaqarfiup nakkutilliivigisai unioqqutinneqarsimasut, uumasunut nakorsaqarnermut immikkoortortaqarfiup politimesteri unnerluussuteqaqqullugu qinnuigisinnaavaa. Tamanna aamma atuuppoq eqqartuussivimmit inerteqquteqarneq unioqqutinneqarsimappat.

Kapitali 6

Sioqqutsisumik nalunaaruteqartarneq

§ 26. Atuisartoqarnermut Unammilleqatigiinnermullu aqutsisoqarfik isummernissaq immikkut nalornissuteqalersitsissanngippat imaluunniit allatigut immikkut pisunik pisoqanngippat, piunaffigineqarnermigut tuniniaanissamik nittarsaassinermut iliuuserisassatut eqqarsaatigineqartut inatsisinik malinniffiunerannut isiginninnini pillugu oqaaseqaateqartassaaq. Sioqqutsisumik nalunaaruteqarnermi iliuusissap pineqartup inatsisinut naapertuunneranut isummertoqavinngilaq.

Imm. 2. Atuisartoqarnermut Unammilleqatigiinnermullu Aqutsisoqarfik inuussutissarsiummik ingerlataqartumut sioqqutsisumik nalunaaruteqarpat, iliuuseqarnissaq eqqarsaatigineqartoq Atuisartoqarnermut Unammilleqatigiinnermullu aqutsisoqarfiup paasinninnera malillugu inatsisinut naapertuuttoq, Atuisartoqarnermut Unammilleqatigiinnermullu aqutsisoqarfik iliuuseqarnermut sioqqutsisumik nalunaaruteqarfigineqartumut aammalu taassuma nalunaarutigineqareernerani piffissap naleqquttup iluani aallartinneqartumut, nammineerluni iliuuseqarnermigut inuussutissarsiummik ingerlataqartumut akuliussinnaanngilaq.

Imm. 3. Naalakkersuisut sioqqutsisumik nalunaaruteqarnermut akiliut pillugu maleruagassanik aalajangersaasinnaapput.

Imm. 4. Naalakkersuisut sioqqutsisumik nalunaaruteqarnermi suliaassanik suliarinnittarnermut maleruagassanik aalajangersaasinnaapput.

Kapitali 7

Inuussutissarsiummik ingerlataqartut atuisunit naammagittaalliuutigineqarnerannik suliaqartarneq

§ 27. Nioqqutissat, sullissinerit kiffartuussinerillu pillugit atuisunit naammagittaalliuutit Atuisartoqarnermut Unammilleqatigiinnermullu Aqutsisoqarfimmut suliaassanngortinneqarsinnaapput.

§ 28. Atuisartoqarnermut Unammilleqatigiinnermullu Aqutsisoqarfiup naammagittaalliuutit inatsisini allani immikkut naammagittaalliuuteqartarnermut maleruagassanik imaluunniit naammagittaalliortarfimmik aalajangersaaffiusimasut suliarisinnaanngilai.

§ 29. Illuatungaannarsiortumik imaluunniit isumaqatigiissuteqarnikkut aalajangerneqarsinnaanngilaq, naammagittaalliuutaasoq Atuisartoqarnermut Unammilleqatigiinnermullu Aqutsisoqarfimmut suliaassanngortinneqarsinnaanngitsoq, takuuk § 27.

Imm. 2. Atuisartoqarnermut Unammilleqatigiinnermullu Aqutsisoqarfiup naammagittaalliuutaasoq, Atuisartoqarnermut Unammilleqatigiinnermullu Aqutsisoqarfimmi suliarineqarnissamut naleqqutinngitsutut nalilerneqartoq, suliariumanngissinnaavaa.

Imm. 3. Naammagittaalliornermi atuisoq taparserneqarsinnaanngitsoq ersarilluinnarpat,

Atuisartoqarnermut Unammilleqatigiinnermullu Aqutsisoqarfiup naammagittaalliuutaasoq suliariumannngissinnaavaa.

§ 30. Inuussutissarsiummik ingerlataqartut atuisunit naammagittaalliuutigineqarnerannut Atuisartoqarnermut Unammilleqatigiinnermullu Aqutsisoqarfimmi aalajangiinerit Aqutsisoqarfimmi pisortamit imaluunniit sinniisussamit taassuma toqqagaanit aalajangiiffigineqassapput.

§ 31. Naammagittaalliuutaasoq eqqartuussivinni imaluunniit isumaqatigiissitsiniarnikkut aalajangiisartunit aalajangiiffiusoq, Atuisartoqarnermut Unammilleqatigiinnermullu Aqutsisoqarfimmut suliaannngortinneqarsinnaanngilaq.

§ 32. Inuussutissarsiummik ingerlataqartup aalajangiinnermut Atuisartoqarnermut Unammilleqatigiinnermullu Aqutsisoqarfimmit aalajangiunneqarsimasumut pituttorsimanissaq kissaatiginngikkuniuk, inuussutissarsiummik ingerlataqartup tamanna allakkatigut Atuisartoqarnermut Unammilleqatigiinnermullu Aqutsisoqarfimmut aalajangiinerup nalunaarutigineqarneranit ullut 30-t qaangiutsinnagit nalunaarutigissavaa.

§ 33. Naammagittaalliornermut suliamik aallartitseqqinnissaq pillugu inuussutissarsiummik ingerlataqartumit piunasaqaat, § 32-imi piffissaliussa q nangertinnagu allaganngorlugu Atuisartoqarnermut Unammilleqatigiinnermullu Aqutsisoqarfimmut tunniunneqarsimasoq, kinguartitsinissamik sunniuteqassaaq. Tamatuma kingorna § 32-imi piffissaliussa piffissamit Atuisartoqarnermut Unammilleqatigiinnermullu Aqutsisoqarfiup aallartitseqqinnissamik suliami aalajangeereerneranit naatsorsorneqassaaq.

§ 34. Atuisartoqarnermut Unammilleqatigiinnermullu Aqutsisoqarfiup naammagittaalliummut suliani aalajangiineri §§ 32-imi aamma 33-imi piffissaliussat qaangiutereerneranni inuussutissarsiummik ingerlataqartumut tunngatillugu pinngitsaaliissummik naammassineqarsinnaapput.

Imm. 2. Pinngitsaaliissummik naammassinninnissaq pillugu eqqartuussivinnut piunasaqaateqarnermut Atuisartoqarnermut Unammilleqatigiinnermullu Aqutsisoqarfiup aalajangiinera pinngitsaaliissummik naammassinninnissamik piunasaqarnermut tunngavissaliisoq aammalu pineqartoq aalajangiinnermut pituttorsimanissamik kissaateqanngitsoq §§ 32-imi aamma 33-imi piffissaliussat sioqqullugit inuussutissarsiummik ingerlataqartoq nalunaaruteqarsimannngitsoq Atuisartoqarnermut Unammilleqatigiinnermullu Aqutsisoqarfimmit uppersaat ilanngunneqassapput.

§ 35. Naammagittaalliuuteqarnermut suliami aalajangiisoqareerpat illuatungeriit tamarmik immikkut suliaq eqqartuussivinnut suliaannngortissinnaavaat. Aalajangiinerit

malinneqanngippata Atuisartoqarnermut Unammilleqatigiinnermullu Aqutsisoqarfiup atuisup piunasaqarneratigut suliassaq atuisoq sinnerlugu eqqartuussivinnut suliassanngortissinnaavaa.

Imm. 2. Atuisartoqarnermut Unammilleqatigiinnermullu Aqutsisoqarfiup aalajangiineri allaffissornikkut oqartussaasumut allamut suliassanngortinneqarsinnaanngillat.

Kapitali 8

Paasissutissat aamma tamanut ammasumik saqqummiussisarneq

§ 36. Atuisartoqarnermut Unammilleqatigiinnermullu Aqutsisoqarfimmit aalajangiinerit tamanit soqutiginaateqartut tamanut ammasumik saqqummiunneqarsinnaapput.

Imm. 2. Tamanut ammasumik saqqummiussineq kinaassuseq ersigunnaartillugu pissaaq.

§ 37. Atuisartoqarnermut Unammilleqatigiinnermullu Aqutsisoqarfik inuussutissarsiummik ingerlataqartunut Atuisartoqarnermut Unammilleqatigiinnermullu Aqutsisoqarfiup aalajangiinerinik malinninngitsunut allattuiffimmik tamanut ammasumik saqqummersitsisinnaavoq.

Imm. 2. Imm. 1 malillugu tamanut ammasumik saqqummersitsineq pisinnaavoq

1) ullunik 30-nik piffissaliussap § 32-mi aalajangersarneqartup iluani aalajangiineq malinneqarsimanngippat, aamma

2) Atuisartoqarnermut Unammilleqatigiinnermullu Aqutsisoqarfiup nr. 1-imi piffissaliussap taaneqartup naareernerani inuussutissarsiummik ingerlataqartoq allakkatigut nalunaarfigisimanngippagu paasissutissanik tunniussinermit ullunik 14-inik piffissaliussinerup iluani aalajangiineq malinneqanngippat malinnissimannginnerup imm. 1 malillugu tamanut ammasumik saqqummiunneqarneranik malitseqarsinnaasoq.

Imm. 3. Aalajangiineq eqqartuussivimmut suliassanngortinneqarsimappat, eqqartuussivimmit inaarutaasumik aalajangiineq pereersimatinnagu, imm. 1 malillugu tamanut ammasumik saqqummiussineq pisinnaanngilaq.

Imm. 4. Inuussutissarsiummik ingerlataqartup aqqanik tamanut ammasumik saqqummiussinissaq, inuussutissarsiummik ingerlataqartup piunasaqarneratigut kinguartinneqassaaq, aalajangiinerup malinneqarnissaanut apeqquummut assingusumut eqqartuussiviup aalajangiinissaa, aalajangiinnermut pineqartumut pingaaruteqarsinnaasoq, utaqqineqarpat. taamaattoqarsimappat tamanut ammasumik saqqummiussineq aatsaat eqqartuussiviup aalajangiinerata kingorna ullut 30-t qaangiunneranni pisinnaavoq.

Imm. 5. Inuussutissarsiummik ingerlataqartup aqqanik tamanut ammasumik saqqummiussineq pismappat, aammalu tamatuma kingorna aalajangiineq malinneqarpat, inuussutissarsiummik ingerlataqartoq pillugu paasissutissat allattuiffimmit peerneqassapput.

Imm. 6. Inuussutissarsiteqartup aqqanik tamanut ammasumik saqqummiussineq sivilunerpaamik ukiumik ataatsimik sivilussuseqassaaq.

Kapitali 9

Inerteqqutit aamma pineqaatissiisutit

§ 38. Iliuseqarnerit Inatsisartut inatsisaanni matumani aalajangersakkanut imaluunniit aalajangersakkanut Inatsisartut inatsisaanni tunngaveqartumik aalajangersagaasunut unioqutitsisut eqqartuussiviup eqqartuussinikkut inerteqqutigisinnaavai.

Imm. 2. Imm. 1 malillugu suliasat siullertut suliarinnittussatut Kalaallit Nunaanni eqqartuussivinni suliakkiissutigineqartassapput.

§ 39. Akiliisussanngortinneqarluni eqqartuunneqarsinnaavoq:

1) § 3, imm. 1-2-imik, § 4-mik, § 5-imik, § 6, imm. 1-imik, 3-mik aamma 6-imik, § 8, imm. 1 uniffik siullermik, § 9, imm. 2-3-mik, § 10-mik, § 11, imm. 1-imik, § 12-imik, § 22-mik aamma § 23-imik unioqutitsisoq.

2) Piaaraluni § 21-imik unioqutitsisoq.

3) Ussasaarutunik assingusunik, takuuk § 5, imm. 1, § 5, imm. 2-imi maleruagassat malinnagit atuisoq.

4) § 10, imm. 1-imut aamma 2-imut akerliusumik tuniniaanissamik nittarsaassisoq.

5) 14, imm. 1-imut aamma 2-imut akerliusumik pisinissamik atuisartumut pisisartumullu kaammattuisoq.

6) § 15, imm. 2-mi aamma 3-imi, § 17, imm. 1-imi aamma 3-imi, imaluunniit § 19-imi peqqusissutigineqartutut paasissutissanik tunniussinngitsoq.

7) § 24, imm. 4, § 24, imm. 5 naapertorlugit paasissutissanik tunniussinngitsoortoq, imaluunniit pissutsinik Inatsisartut inatsisaanni pineqartunut ilaasunik eqqunngitsunik imaluunniit ukapaatitsisumik paasissutissiisoq.

8) Inerteqquteqarnermik § 38 malillugu pineqaatissiisutigineqartumik unioqutitsisoq.

Imm. 2. Najoqqutassanut Inatsisartut inatsisaat manna naapertorlugu atuutsinneqalersimasunut, Kalaallit Nunaanni pinerluttulerinermut inatsimmi maleruagassat malillugit akileeqqusissutitut iluseqartunik iliussissanik aalajangersaasoqarsinnaavoq.

Imm. 3. Akileeqqusissummik aalajangersaaneq Inatsisartut inatsisaanni imaluunniit najoqqutassani Inatsisartut inatsisaat naapertorlugu atuutsinneqalersimasuni inatsisitigut tunngaveqarpat, akileeqqusissut Kalaallit Nunaanni pinerluttulerinermut inatsimmi maleruagassat malillugit pisinnaatitaasunut pisussaataasunullu peqqusissutigineqarsinnaavoq.

Imm. 4. Akileeqqusissutit Inatsisartut inatsisaat manna malillugu imaluunniit najoqqutassat Inatsisartut inatsisaat naapertorlugu aalajangersarneqartut malillugit pineqaatissiisutigineqartut Nunap karsianut tutsinneqassapput.

Kapitali 10

Atuutilersitsineq

§ 40. Inatsisartut inatsisaat ulloq 1. juli 2014 atuutilerpoq.

Imm. 2. Peqatigisaanik atuisartunut pisisartunullu siunnersuisartoqatigiit, tuniniaasarneq, nalunaaqutsersuisarneq, akit aamma atuisartunut pisisartunullu maalaaruteqartarfittut ataatsimiititaliat pillugit Inatsisartut inatsisaat nr. 10, 13. november 1986-imeersoq atorunnaarsinneqarpoq.

Imm. 3. Maleruagassat Inatsisartut inatsisaat imm. 2-mi taaneqartoq malillugu atuutilersinneqartut, inatsisartut inatsisaat manna imaluunniit allat naapertorlugit taarserneqarnissamik imaluunniit atorunnaarsinneqarnissamik tungaanut atuutiinnassapput.

Namminersorlutik Oqartussat, ulloq xx.xx.2014

Aleqa Hammond